

Гийса МасихI дышгIадрийыз

1 Дара ауат амшква рагIан адгьыл шабгу йыквчIвата йыбзазауа ауагIа зымгIва йыпхьадзата йыгIвыхра атахьыпI йхIван Цезар Аугустус ауаса йыщаквйыргылтI. 2 Ауи ауагIа рыпхьадзара Квириниус Сириа дахьыта йаныйнапIыцIаз агIан йапхьахауа уагIапхьадзаран. 3 ДасузлакIгьи тшандыныйцIарныс дыджвыквылтI, дызачIвызлакIгьи йара йыкIвыршарта ахьыла дыцахуан. 4 Ауи апшта Йусуфгьи Даут йытгIачва-йыжвла даъауаз йыгIалцIуата Галилеа дытыцIын, Назарет кIвыршарта дытыцIын, Галилеа йыгIаланакIуа БейтлехIем кIвыршартахIва йазпхьауа Даут йыкIвыршарта ахьыла дыджвыквылтI. 5 Йусуфи Йусуф йызырхIвайыз Марйами тшанддырцIарныс йыджвыквылтI. Марйам ауи асхьан дымгвадууын. 6 Ауаъа йаннадза Марйам лыхьара гIалщахIалтI. 7 ДыхьатI. Дыхьан апхьахьшата па дылоутI. ЙыгаракIасква йыкIвлыршан аччора дыталцIатI, йауа уыхIварыкIвын Йусуфгьи Ларгьи асасырта йыздгылыз йырчвыта йыгIацIцIын даргьи пхьартадаъа йыгIанхатI. 8 Ауи агIан архьа апны ауасакчачва ыквын, рыуасакIвычаква уахьынла йырхчалун. 9 Анчва йдыура гIайкIачIчIауа, акIкIара йыхьагыла, Анчва йыхIвачIвыгIвы ауаъапны зынла дыгIаншан ауасакчачва рпахь дыгIагылтI. Ауасакчачвагьи швара дыу алырхтI. 10-12 «Швымшван! Сара ауагIа зымгIва зыргвыргъуш ргвыргъьарадукI швасхIвитI: УахьчIва Даут йыкIвыршарта апны швара швызымрыдзуаш ШвыхчагIвы дыгIадрийтI. Ауи ЙыхIаракIу МасихI йакIвапI. Абар швара швыхьазла адыргагьи: АцIайпшка агаракIасква йыкIвырша аччора дытата дыжвбуштI», — йхIван йырайхIватI ахIвачIвгIвы. 13 Иара ауаъапны зынла цIгIва змам ажвгIванд ар Анчва йыхIвачIвыгIвы йыгIайыдзхьагылтI. 14 «АжвгIванд йыквчIваквугьи Анчва дыдыртшыхьваларагIатI! АчIвыла ахьахь йыквта Ауи йылпха зыквшваз ауагIа зымгIвагьи ргвы-рпсы щтIакIызтI!» — хIва ауат Анчва йыхьыз щтIырхуан. 15 «БейтлехIем хIыцапIта ари акIвапI йыгIаншазхIвата ЙыхIаракIу йыхIызгIайыргаз гIахIхIырдырпI», —

рхІван ауасахчачва айчважватІ ахІвачІвыгІвчва ауат йыркъвыщІхта
ажвгІванд йанхъалх амщтахъ. 16 ЙыгІадрыласын йгІайын
йыгырбатІ Марйамгы, Йусуфгы, аччора йтаз Апшкагы. 17 Ауат
анырба Апшка йыхъаз ахІвачІвыгІвчва йырхІваз Марйами Йусуфи
йырархІватІ. 18 Ауасахчачва йырхІвауа зыгІаз зымгІвадзугы
йырымаджъащахъван. 19 Марйамгы арат ажваква закІы агІв
лымщтуа зымгІва лгвы йыталкІуан. 20 Ауасахчачвагы Анчва
йыхъыз щгІырхуа, Анчва дыдырдууа-дыдыртшхъвауа
йыгІахъынхІвыхын йыгІайхтІ.